

# **Inatsisartunut Naalakkersuisunullu il.il. ilaasortat aninggaasarsiaqartitaanerat il.il. pillugit Inatsisartut inatsisaata allanngortinnejnarneranik Inatsisartut inatsisaat (Inatsisartunut ilaasortat il.il. sulinngiffeqarallarsinnaanerannut il.il. malittarisassanik Inatsisartut aalajangersaanerat)**

## **§ 1**

Inatsisartunut Naalakkersuisunullu il.il. ilaasortat aninggaasarsiaqartitaanerat il.il. pillugit Inatsisartut inatsisaanni nr. 22-mi 18. december 2003-meersumi, kingullermik inatsisartut inatsisaatigut nr. 2, 15. april 2011-meersukkut allanngortinnejpartumi, makku allanngutigitinneqassapput:

### **1. § 2, imm. 2-5 ima oqaasertaqassapput:**

"*Imm. 2. Inatsisartunit sulinngiffeqarallartarnermut najuutinngikkallartarnermullu akuersisarnermut malittarisassanik Inatsisartut aalajangersaassapput.*

*Imm. 3. Aninggaasarsiaqaataasumik sulinngiffeqarallarsinnaaneq aatsaat akuersissutigineqarsinnaavoq Inatsisartunut ilaasortaq pissutissaqavilluni najuussinnaanngippat imaluunniit malittarisassat imm. 2 malillugu aalajangersarneqartut tassungalu assersuunneqarsinnaasut malillugit.*

*Imm. 4. Inatsisartunut ilaasortaq pisuni immikkorluinnaq ittuni aninggaasarsiaqaataanngitsumik sulinngiffeqarnissamut akuerineqarpat, ilaasortaq aninggaasarsiaqartitaassanngilaq aninggaasartuutinulluunniit tapiissutinik pisartagaqassanani, taamatullu aamma sulinngiffeqarallarnerup nalaani soraarnerussutisiassanut ilaasortaajunnaarnersiutinulluunniit katersaqarsinnaanani.*

*Imm. 5. Inatsisartunut ilaasortaq Naalakkersuisunut ilaasortatut atuuffeqarniarluni sulinngiffeqarallarnissamut akuerineqartoq, sulinngiffeqarallarnerup nalaani ilaasortaajunnaarnersiutissanik katersaqarsinnaanngilaq."*

### **2. § 3-p kingornanut paragrafitut nutaatut ilanngunneqassaaq:**

*"3a. Qanigisamik toqusoqartillugu pinartumilluunniit napparsimasoqartillugu malittarisassat Namminersorlutik Oqartussani tjenestemandinut qaqugukkulluunniit atuuttut malillugit akiliunneqarluni angalasoqarsinnaavoq."*

### **3. § 6 ima oqaasertaqassaaq:**

*"§ 6. Inatsisartut siulittaasuat, Naalakkersuisut siulittaasuat Naalakkersuisunullu ilaasortat aninggaasarsiat § 1, imm. 1-imi taaneqartut saniatigut akissaatit inissismaffiat 38 malillugu aninggaasarsianik tapisianik*

tamanut atuuttunik ilasanik ukiumut aningaasarsiaqartinneqassapput. Aningaasarsiat naatsorsorneqassapput tjenestemandit akissarsiaasa allallu iluarsiivigineqartarnerat pillugu ASG-mut isumaqatigiissut qaqugukkulluunniit atuuttoq aallaavigalugu.

*Imm. 2. Inatsisartut siulittaasuannut Naalakkersuisullu siulittaasuannut kr. 120.930-nik immikkut tapisiaqartitsisoqassaaq.*

*Imm. 3. Naalakkersuisunut ilaasortanut Inatsisartunut ilaasortaannngitsunut Inatsisartunut ilaasortat aningaasarsiaasa § 1, imm. 1-imi taaneqartut annertoqataannik tapisiaqartitsisoqassaaq.*

*Imm. 4. Inatsisartut siulittaasuut, Naalakkersuisut siulittaasuut Naalakkersuisunullu ilaasortat qaammatip qinigaaffiup aallaqqaataanit qaammatip taamatut atuukkunnaarfíup naanissaata tungaanut aningaasarsiaqartinneqassapput. Aningaasarsiat qaammammut siumoortumik tunniunneqassapput. Imm. 1 - 3-mi taaneqartutut aningaasarsiat tapisiallu iluarsiivigineqartarnerisa ASG-mi isumaqatigiinniuteqartarfímmi ineriarneq malittaraat.*

*Imm. 5. Inatsisartut siulittaasuut Naalakkersuisullu siulittaasuut ineqartinneqassapput. Siulittaasut inigisap attartorneranut akiliisassanngillat, ukiumulli attartornerup kr. 48.000 kr-inik nalilerneqarnera tunngavigalugu akileraartinneqassallutik. Namminersorlutik Oqartussat inessianik ingerlatsinermut aningaasartuutit akilertassavaat. Inessianut atatillugu ingerlatsinermut aningaasartuutit isertitat akileraaruteqataasussat naatsorsorneqarneranni ilaatinneqartassanngillat.*

*Imm. 6. Naalakkersuisunut ilaasortanut inissamik atugassiisoqassaaq. Ilasortat Namminersorlutik Oqartussat atorfímmut atasumik pinngitsoorani inigisassatut inigitittagaanni ineqarnermut akiliutinik naatsorsuisarnermi maleruagassat qaqugukkulluunniit atuuttut 60%-iinik ineqarnermut akiliuteqartassapput.*

*Imm. 7. Procentip imm. 6-imi taaneqartup aamma sulisorisanut inissiamut ineqarnermut akiliutip tamakkiisup assigiinngissutaat inuit pineqartut isertitaasa akileraaruteqataasussat naatsorsorneqarneranni ilaatinneqassanngillat.*

*Imm. 8. Inigisat imm. 5 aamma 6 malillugit atugassiissutigineqartut atuuffíup naanerani qimanneqassapput. Inissiat pineqartut nutserfigineqarnerinut qimanneqarnerinillu atatillugu aningaasartuutit Namminersorlutik Oqartussanit matussuserneqartassapput.*

*Imm. 9. Piffissami ilaasortaajunnaarnersiuteqarfímmi utaqqiisaasumik ineqartitsisoqassaaq. Inessianut Namminersornerullutik Oqartussat attartortittagaannut ineqarnermut akiliutit naatsorsorneqartarnerinut maleruagassat qaqugukkulluunniit atuuttut naapertorlugit ineqarnermut akiliuteqartoqartassaaq. Piffissaq ilaasortaajunnaarnersiuteqarfík naappat inigisaq qimanneqassaaq.*

*Imm. 10. Napparsimaneq aamma qanigisap toquneranut napparsimarulunneranulluunniit atatillugu najuutinnginneq Naalakkersuisut Siulittaasuannut Naalakkersuisunullu ilaasortanut pissutissaqavilluni peqataannginnertut isigineqassaaq. Najuutinnginnermi Namminersorlutik Oqartussani kommuninilu tjenestemandinut malittarisassassat qaqugukkulluunniit atuuttut malillugit akiliunneqarluni angalasoqarsinnaatitaavoq.*

*Imm. 11. Naartunermut, erninermut meeravissiartaarnermullu atatillugu sulinngiffeqarneq Naalakkersuisut Siulittaasuannut Naalakkersuisunullu ilaasortanut pissutissaqavilluni peqataannginnertut najuutinnginnertut isigineqassaaq.”*

## § 2

Inatsisartut inatsisaat una ulloq 1. juli 2015 atuutileroq.

*Namminersorlutik Oqartussat, ulloq 3. juni 2015*

Kim Kielsen

**Namminersorlutik Oqartussat**  
Imaneq 4  
3900 Nuuk  
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut